

Turlaget skeptisk til utbygging i Øksnesmarka.

Nordhordland turlag har i sin formålsparagraf å støtte det enkle, nære friluftslivet. Vi ønskjer det skal vere lett for folk i alle alder å komme seg ut. I Austrheim ligg tilhøva godt til rette.

Det er med undring vi høyrer og les at Øksnesmarka er trua av utbygging for industri. Ikkje rør det store, opne, lyngheilandskapet i Austrheim; la det liggje urørt og vitne om ei tid og ein kultur som har prega kystfolket i århundre. La det liggje og vera til glede for folk i framtida også.

Området er eit rikt friluftsområde, med stiar, merka og umerka, steinmurar og spor av tidlege tider sitt liv og verke, med småvatn og myrer, med rikt dyre- og fugleliv – og ro og fred. Langs kysten er det lett å komme fram med båt, kano, kajakk, lett å finne gode bade- og fiskeplassar. Øksnesmarka er eit rekreasjonsområde.

Turlaget erfarer at Austrheim kommune har kartlagt "Øksnesmarka" som friluftsområde (utfartsområde) som svært viktig (A-område). Det gjør godt å høre.

Men turlaget registrerer også at kommunen lenge har vore aktiv med å få folk til å byggje hytta si i Austrheim; kanskje med løfte om urørt natur, ro og friluftsliv.

Byggjefeltet vart eit inngrep i kystlandskapet her.

Men andre aktørar kjem til, med meir djuptgripande planar, og det same området vert no tenkt nytta for industri og med djupvasskai. Korleis går det då med urørt natur og ro? - Det ligg allereie store industriområde i nærleiken, både på Mongstad og over fjorden i Gulen. Her er inngrepa store og kan ikkje verta reversert. Turlaget ber politikarane i Austrheim sjå om ny industri kan leggjast nær andre, utbygde område? Er draumen om ny storindustri i Austrheim realistisk, eller kan det verte bom og Øksnesmarka øydelagt for alltid, slik ein ser har skjedd andre stader, utan at kommunen får nye arbeidsplassar? Turlaget spør, for vi vil syne vår støtte til dei som arbeider med å ta vare på marka.

Austrheim har byggefelt sentralt og elles levande bygder med lang historie.

Innimellom ligg Øksnesmarka og lokkar med trim, god helse og gode opplevingar.

Nordhordland turlag ber politikarane i Austrheim ta omsyn til friluftsinteressene og folkehelsa og sin eigen historie i den vidare handsaminga av kommuneplanen.